

MASFJORDEN KOMMUNE
Austfjordvegen 2724
5981 MASFJORDNES

Dato: 01.12.2017
Vår ref.: 2017/16774-2
Saksbehandlar: hanespe
Dykkar ref.:

Att. - Alf Magnar Strand

Masfjorden – innspel til kommunedelplan for idrett, friluftsliv og fysisk aktivitet 2017 - 2024

Masfjorden kommune har sendt kommunedelplan for idrett, friluftsliv og fysisk aktivitet 2017 – 2024 til offentlig ettersyn med høringsfrist 01.12.2017. Hordaland fylkeskommune tok i mot planen 6.11.2017.

Kulturdepartementet set følgjande krav i Føresegner om tilskot til anlegg for idrett og fysisk aktivitet – 2017, punkt 2.2.7: Det er eit vilkår for å kunne søke om spelemidlar at anlegget er ein del av ein vedteken kommunal plan som omfattar idrett og fysisk aktivitet.

Masfjorden kommune skriv at kommunedelplan for idrett, friluftsliv og fysisk aktivitet 2017 - 2024 skal vera eit politisk dokument og eit styringsverktøy. Hordaland fylkeskommune meiner at mål og strategiar svarer på aktuelle utfordringar i Masfjorden kommune, er i tråd med vedteken regional politikk, og oppmodar til at gjennomføringa av kommunedelplanen vert prioritert i økonomiplanen. Hordaland fylkeskommune oppmodar til at det vert gjort justeringar og presiseringar i planen i tråd med merknadene i saka.

For ei effektiv gjennomføring av den regionale politikken i Hordaland er samspelet med stat og kommunar avgjerande. Slik fylkeskommunen vurderer det er heilskapen i planen i samsvar med hovudintensjonane i Regional kulturplan 2015 - 2025. For forankringa og gjennomføringa av den regionale politikken for idrett og friluftsliv er difor Masfjorden kommune sitt planframlegg eit godt rammeverk for vidare samarbeid mellom kommune, fylkeskommune og stat når handlingsprogramma vert utarbeidd.

Merknader til delkapitla:

1.0

Ei grei innleiing med konkret og ryddig oppstilling av bakgrunn og grunnlag. Det er for øvrig godt og tilgjengeleg språk gjennom heile planen, noko som i seg sjølv er med å forankre planen betre blant alle lesarar.

1.3

Hordaland fylkeskommune er positiv til at folkehelse får ei overbyggande rolle. Kunnskapsgrunnlag ligg til grunn for vurderingar og prioriteringar, samstundes som det vert sett i samanheng med statlege mål og føringar. Det er positivt at særlege grupper får auka merksemd, og at de peikar på dei utfordringane som

finnast, som t.d. deltaking blant jenter med minoritetsbakgrunn. Det er også veldig flott at de ser verdien av fysisk aktivitet i samheng med sosial aktivitet. Det vil kunne gje stor overføringsverdi og meirverdi.

1.4

Her saknar vi referanse til [regional plan for folkehelse](#), Meld. St. 26 (2011-2012) [Den norske idrettsmodellen](#) og Meld. St. 18 (2015–2016) [Friluftsliv — Natur som kilde til helse og livskvalitet](#).

1.5

Måla som er sett er gode og enkle.

1.6

Det er positivt at kommunen ønskjer å legge til rette for særlege målgrupper. Tiltaka er retta mot områder der de ser utfordringar, og fylkeskommunen meiner at prioriterte tiltak er gode. Det kan kanskje vere naudsynt å konkretisere nokre av tiltaka, slik at det vert reelle tiltak og ikkje mål eller strategiar – som t.d. g) Stimulera etablert idrett og friluftaktivitet for å hindre fråfall. I tillegg kan det hende at tiltaka c), d), e) og f) kan samlast noko – og konkretiserast betre. Dette kapittelet kan med fordel skrivast ut litt meir – gje døme på tiltak eller kanskje legge til ei forklaring.

2.1

Det er svært positivt at de i planen understrekar at det skal tildelast tid på idrettsanlegg for både organisert og eigenorganisert aktivitet. I tillegg vert det peika på at aktivitetsområder må sikrast gjennom arealplanar.

Fylkeskommunen har forståing for geografiske avstandar som gjer satsing på sykkelveggar til ei større utfordringar i nokre kommunar enn andre. De løyser dette fint gjennom ordlyden i kap. 1.2. avsnitt 3.

3.2

Kommunen skildrar situasjonen i Masfjorden, og legg med det grunnlag for vurderingane og prioriteringane i planen. Integrering gjennom idrett er eit fokusområde som vert løfta, både i høve flyktningar og menneske med særlege behov. Når det gjeld sistnemnte gruppe, peikar planen på at det har vore meir utfordrande enn med flyktninggruppa. Ein av grunnane er mangel på tilrettelagte område. Fylkeskommunen oppmodar til å auke fokus på universell utforming for å styrke arbeidet med denne målgruppa. Kanskje kan målgruppa definerast særskilt i kap. 1.4 under målsetjingane. Det er eit mål å integrere fleire generelt – det hadde vore positivt om ein kunne sei noko meir konkret om korleis ein tenkjer det skal gjennomførast, og kven som eventuelt skal ansvarleggjerast.

3.3

Anleggsutvikling er avhengig av gode prosessar og brei medverknad. Det er positivt at idrettsrådet er høyringspart i arbeid med kommunale planar. Det er også veldig bra at det er fokus på koordinering med andre kommunale planar. Fylkeskommunen oppmodar til å involvere endå breiare og særleg innan målgruppa (barn og unge). Og som inspirasjon legg vi ved denne lenkja frå Norsk friluftsliv, som oppmodar kommunane i Noreg til å danne [aktivitetsråd](#).

Fylkeskommunen ønskjer at Masfjorden skal søkje om tilskot til kartlegging og verdisetting av friluftsområder i 2018. Frå 2018 vil det vere eit krav frå Klima- og miljødepartementet om å ha gjennomført ei kartlegging og verdisetting av friluftsområder for å kunne søke om statleg medverknad til sikring av slike område. Registreringsarbeidet er eit nasjonalt prosjekt for kartlegging og verdsetting. Maksimalt tilskot er kr 60.000 pluss kr 30.000 til digitalisering av data og konventering til SOSI standar.

4.0

Det er positivt med resultatvurdering som grunnlag for komande prioriteringar. Fylkeskommunen oppmodar til å tenke interkommunalt for betre ressursutnytting og samhandling på tvers.

Planen bør i tillegg innehalde handlingsprogram både for anlegg og aktivitet knytt opp til budsjett. Programmet bør vere både kortsiktig og langsiktig. Vedlagt bør det også finnast kart.

Britt Karen Spjeld
Fylkesidrettssjef

Hanne Espe
Spesialrådgjevar

Brevet er godkjent elektronisk og har derfor inga underskrift.